

国朝耆献类征初编



國朝書獻類徵初編卷二十三目錄

宰輔二十三

梁詩正

蔣溥

嵇璜

卷五

蘇軾

蘇軾

卷二十三

國朝詩林卷二十三

國朝耆獻類徵初編卷二十三

通奉大夫前署江西巡撫江西布政使司布政使湘陰李桓輯

宰輔二十三

梁詩正

梁詩正浙江錢塘人雍正八年一甲三名進士授編修十年充山東鄉試正考官十二年上書房行走並充日講起居注官尋遷侍讀十三年六月遷侍講學士十一月丁母憂乾隆元年諭曰向來翰林丁憂者有在京修書之例梁詩正著來京在南書房行走五年六月補侍讀學士十月充順天武鄉試正考官十二月遷內閣學士充經筵講官四年正月遷刑部右侍郎五月調戶部右侍

郎五年閏六月詩正父文濂年七十奏請二品封典 上允所請
御製詩賜之曰舊日文章彥熙朝卿貳班重邀花誥寵不異彩
衣斑堂有槐三本門如水一灣更思躋壽世希瑞徧塵寰十一月
轉左侍郎六年三月充 皇清文穎館副總裁尋條奏變通二款一
八旗閒散人丁宜分置邊屯以資生業也查旗人除各省駐防與
近京五百里俱聽屯種餘並隨旗駐京 皇上至仁如天凡爲旗
人資生計者委曲備至而旗人仍不免窮乏益生齒日繁若不使
自爲養而常欲官養之勢有不能臣謂非屯田不可今內地已無
閒田興盛二京膏腴未盡闢 世宗憲皇帝時欲令黑龍江甯古
塔等處分駐旗人耕種查辦已有成議未及舉行今不早爲之所

雖見在尙可支持而數百年後旗戶十倍於今以有數之錢糧贍無窮之生齒使僅取給於額餉之內則兵弁之關支不足供閒散之坐食欲增給於額餉之外則民賦斷難稍加國用在所必需待養者眾固無餘財給之戶口日繁京師亦無餘地處之惟有酌派戶口散列邊屯使世享耕牧之利以時講武且可充實駐防一緣旗增設兵丁宜量停募補以減冗額也查見在各省馬步兵餉較康熙年間漸增至五六百萬在各營鎮每處浮數千百名不覺其多在 朝廷合計兵餉則冗額歲不下數十百萬各省錢糧大半畱充兵餉其不敷者鄰省協撥而解部之項日少向來各營多空糧自雍正元年徹底清查此弊盡除是近年兵額但依舊制亦比

前有虛實之別況直省要害之地多滿洲駐防與各標營鎮協聲
勢聯絡其增設兵額可以減汰者宜酌定數目遇開除空缺卽停
止募補於將來營制漸有節省而見在兵丁實無裁汰之苦奏入
上嘉納之十一月管理吏部右侍郎十年擢戶部尙書十二年
充續文獻通考總裁十三年調兵部尙書十四年二月晉太子少師
十一月兼刑部尙書十二月兼翰林院掌院學士 命協辦大學
士十五年正月遷吏部尙書教習庶吉士五月御史歐堪善疏劾
詩正徇庇行私各款 諭曰歐堪善奏參梁詩正一摺朕召軍機
大臣吏部堂官掌院學士及該御史面加詢問高山係梁詩正房
師至帶領引見吏部祇據投供人員依次擬缺大學士公傅恆因

在軍機處承旨知其見在直隸修城而該司以修城無案可稽部
選自遵成例帶領引見單內夾片聲明則高山之引見道缺係該
堂官公同辦理其不出於梁詩正瞻徇師生情分不待辨矣保舉
金烈一事亦該堂官公同商辦其不由科道與例不符曾於摺內
聲明梁詩正並將不合例之處先期商之傅恆及詢歐堪善以金
烈有無夤緣梁詩正形跡令其回奏據稱並無可指此二款雖有
師生同鄉之嫌初無曖昧徇私實跡至姚範陳兆崙列入京察一
等則姚範人本平常不堪超擢之選陳兆崙前次京察一等見係
丁憂並不在京供職此則梁詩正不無徇其翰林輪班引見臨
期越次更換每不過一二員或因偶爾違疾亦事之所有若如歐

堪善摺內所指已有五員此中不無高下其手著問明更換情由
是否出自梁詩正之意再行交部察議梁詩正協辦閣務專領銓
曹其供職內廷不過筆墨之事初非格外加之寵任若謂其招權
納賄植黨營私則是伊福薄不能承受恩典矣且朕何如主而大
臣能恣行其胸臆乎至小小瞻徇情面則不獨梁詩正舉朝大臣
恐俱未能盡絕且如張廷玉掌院幾三十年似此攙越引見之事
不知凡幾何以並無一人奏參然卽有其事亦復何關政治在梁
詩正有此一二可議卽被奏參得以知所做省未始非福歐堪善
之言當以爲感而不當以爲怨也時御史儲麟趾疏參四川學政
朱荃匿喪 上以詢詩正詩正奏對未晰交部察議尋議革職

命從寬畱任十二月 恩賞其子舉人敦書廕生分部學習十六
年扈 蹕南巡詩正父年八十 特晉一品封典給假畱侍旬月
十七年疏請終養 賜以詩曰遺榮空合道未老暫抽簪甚悉忠
勤意甯知孝治心歡承備鐘鼎跡異樂泉林翻祝歸朝晚卿家慶
倍深二十二年 上南巡詩正迎 鑾 命在籍食俸二十三年
六月丁憂九月 特命署工部尙書二十四年正月調署兵部尙
書四月 命在紫禁城內騎馬八月充順天鄉試正考官二十五
年七月教習庶吉士九月實授兵部尙書協辦大學士兼翰林院
掌院學士充經筵講官二十七年充順天鄉試正考官二十八年
六月 命爲東閣大學士兼管吏部尙書十月晉太子太傅詩正

以次子敦書任貴州知府俸滿當來京引 見奏請畱部得 旨

以戶部郎中用十一月詩正卒 諭曰大學士梁詩正老成端重

奉職恪勤侍直內廷晉階綸閣方資簡任遽聞溘逝深爲軫恤著

皇五子前往奠醑並加贈太保入祀賢良祠賞給內庫銀一千兩

治喪念伊子梁敦書尙未到京寓次乏人著派內務府司官一員

前往經理喪事應得卹典該部察例具奏尋 賜祭葬如例諡文

莊二十九年 諭曰原任大學士梁詩正靈輶歸里沿途文武官

弁在二十里以內者著俱赴舟次弔奠並遣人護送俾得穩抵故

里以示優卹四十五年 上追念內廷詞臣資望最久者莫如詩

正及故刑部尙書張照 御製懷舊詩列詩正於五詞臣之首詩

戶未可甘盤倫祇宜顏般等信稱館閣材句每有清警踐更既已
深遂亦絲綸領一夜無病逝入閣實未永持身恪且勤居家儉而
省內廷行最久交接一以屏不似張揮霍故率稱其冷翻以是嘉
之吾豈蔽近倖詩正子二長同書原任侍讀次卽敦書由廕生分
工部學習乾隆十六年選奉天府治中奉 旨畱部以員外郎用
十七年補刑部員外郎二十年授貴州銅仁府知府二十四年調
遵義二十八年俸滿 特命以戶部郎中用尋丁父憂服闋補戶
部郎中三十三年調吏部郎中三十四年授江蘇常州府知府三
十五年遷湖南岳常澧道三十八年調驛鹽道四十一年九月遷
福建按察使十一月調湖南四十三年調廣東四十四年擢湖北

布政使四十六年奉 旨來京另用四十七年二月授左副都御史五十年七月遷工部右侍郎八月署兵部右侍郎五十一年卒

右 國史館本傳

皇帝御宇之二十有八載相國錢唐梁公以疾薨於位 上聞震

悼 命皇五子詣靈奠醑晉 贈太保諡文莊 予入賢良祠

賜內庫白金千兩治喪公有子遠守遵義乞內侍養已調戶部郎

中道遠尙羈職守 上念旅邸無人 命內務府派員經理其事

部察卹典具奏 諭祭葬如例入祠加祭一壇 令翰林院立傳

啟殯之日復奉 恩旨所過沿途二十里內官弁並赴舟次弔奠

遣人護送哀榮禮備冠絕寮案公起自田間受 兩朝不世之知

遇回翔館閣出入禁闈洊歷卿宰以至延登受策隆恩渥澤
古罕倫比而筋力且就衰年運不我與高厚之恩待酬於萬一報
國之心積縈於寤寐公雖死而目猶未瞑也葬有日矣隧道之銘
孤子排纘行事先期來請余與公同備顧問參密勿朝夕繼見
垂三十載知公特深其忍不銘按狀公諱詩正字養仲號薌林梁
氏系出新里所可考者善菴公積從宋室南渡爲遷杭始祖著籍
錢唐曾祖萬鍾祖國儀隱德不曜皆以公貴贈光祿大夫經筵
講官太子少師協辦大學士吏部尙書曾祖母汪祖母施並贈
一品夫人考谿父公諱文濂歲貢生選授諸暨縣學訓導不就以
公貴累封如前母凌累贈至一品夫人公生有異稟五歲始

能言授以四五言詩略上口卽能誦長擅文譽與兄啟心有二難
之目年三十始舉鄉試又五年成進士時雍正八年庚戌也 殿
試以一甲第三名及第授職編修旋充一統志纂修官未散館出
典山東鄉試爲正考官明年癸丑充會試同考官又明年選入
上書房得侍 今上皇帝暨誠和兩親王講讀九月充日講官起
居注十月晉侍讀明年晉侍講學士淩太夫人病亟乞假遽歸驚
聞 世宗憲皇帝賓天已擬束裝疾赴 梓宮哭臨先一日而淩
太夫人卒督撫上 聞 賞藩庫銀五百兩治喪未期年 詔起
入直 南書房垂問塗次病瘡狀 賜御醫並葢藥 諭令以素
服入直照見任學士例給俸兼 懋勤殿行走 賜外城第宅一

區甫釋服補授侍讀學士充日講官起居注仍兼阿哥書房行走
是冬充順天武鄉試正考官旋晉內閣學士兼禮部侍郎即日充
經筵講官乾隆四年正月補授刑部右侍郎五月調戶部兼理錢
法五年條奏旗丁事宜蒙 俞允十一月轉左謝錢法事六年谿
父公年屆七十 恩給二品封典 御製五言律詩 御書傳經
介社四字以賜四月奉 命仍兼錢法事務七月扈從木蘭十一
月兼吏部右侍郎事是年充 皇清文穎館總裁官七年二月扈
從恭謁 泰陵四月充殿試讀卷官旋 命閱新進士朝考卷是
年兼 御書處行走八年七月 皇上親謁 祖陵駐 蹕盛京
公與扈從 上升殿大宴蒙 恩召赴榻前 手賜一卮時與者

不過數人九年六月 賜書清勤堂三字扁額是冬扈從盤山

宮門去內殿稍遠每遇宣喚 恩許乘騎而行重葺翰林院落成

車駕臨幸 錫宴賦詩 賞賚有差公以侍郎 特恩照尙書

品級優賜十年二月扈從謁 東陵五月補授戶部尙書奉 命

閱新進士朝考卷七月扈 駕幸多倫諾爾十有一年九月扈從

謁 泰陵詣五臺十有二年六月充續文獻通考館總裁官七月

扈從木蘭十有三年正月扈 駕東巡謁 孔林次祭嶽廟登泰

岱 上以山徑險仄 諭公不必隨上沿嶺派侍衛分駐有交辦

事遞傳上下三月奉 命閱會試迴避卷四月調補兵部尙書又

命閱新進士朝考卷九月扈從謁 泰陵金匱梗化大學士傳